

Edificio di SIAD ta haya nomber 'Armand Wilco Engelbrecht'

ORANJESTAD (AAN): Dialuna mainta Gabinete Mike Eman ta rindi honor na e prome Minister di Finanzas di Pais Aruba: Armand Wilco "Manchi" Engelbrecht. Den e compleho di edificio, situa na Camacuri 2, ta ubica Direccion di Impuesto y Aduana (DIA), Servicio di Impuesto y Servicio di Aduana (SIAD) y Departamento di Finanzas.

E compleho cu ta conoci como 'Bel-Fin complex' awe ta haya e nomber di e mandatario aki cu a goberna y maneha finanza di Aruba den un periodo dificil, ora cu LAGO a cera su portanan cu consecuencia cu tabata reina un situacion dificil na Aruba.

Engelbrecht a forma parti di prome Gabinete Henny Eman y tabatin e tarea grandi pa saca Aruba for di e crisis cu a surgi cu ciere di e refineria y crea formanan pa Aruba haya e entrada cu el a perde cu ciere di LAGO. Cu man duro, pero den forma recto y integro, manera e tabata conoci p'e, Armand Engelbrecht a maneha e cartera di finanza di Aruba.

Un trabao cu el a haci excelentemente.

Na 1977 Armand Wilco 'Manchi' Engelbrecht, un maestro di school, a drenta politica uniendo su mes na partido AVP. Manchi tabata un homber modesto, un persona recto, integro, luchado kende a lucha cu alma y cuerpo pa Aruba por a bay dilanti. Na mas di un ocasion Manchi tabata miembro di Eilandsraad, miembro di Staten y despues di Status Aparte na 1986 e tabata e prome Minister di Finanza pa pais Aruba. Den Gabinete Eman II un biaha mas a pidi Manchi pa tuma e reto pa fungi como Minister di Finanzas.

Un funcion cu el a cumpli cabalmente cun'e. Manchi tabata un persona no-nonsense cu tabata sa kico e mester a haci. Na 2000 Manchi ta perde su prome señora. Un sla duro cu el a supera cu ayudo di su yiunan y e

hendenan rond di dje. Na 2001 Manchi ta haya e noticia cu e tin un enfermedad maligno. Un otro lucha a sigui. E lucha pa su salud.

Un lucha cu Manchi a hiba cu tenacidad, un lucha entre speranza y temor, pero e lucha aki tabata uno desigual. Ni maské cuanto el a bringa, e lucha aki si e no por a

vence. Dia 8 di juni 2004 Manchi Engelbrecht, interna na Hulanda, den presencia di su di dos casa Lenny y un yiu, a cera su wowonan pa semper. Gabinete Mike Eman ta rindi honor na e gran homber aki dunando e compleho di edificionan di gobierno na Camacuri su nomber reconociendo su meritonan.

